

sier e vice luogotenente, et sier Francesco da Molin e sier Alvixe Beneto camerlengi, vice consieri. Date a Nicosia. Il sumario dirò di soto, et mandano avisi da Tripoli.

223^b *Copia di una letera dil Signor turcho scritta al rezimento di Cypri, drizatu a sier Donado Marzelo luogotenente, credendo fusse ancora de li.*

Sultan Selim sach, Dei gratia imperator maximus Asie, Persarum, Sirie, Arabum et Egypti, a Donado Marzelo locotenente et Consieri de Cipro.

Sapiate come havemo de bisogno robe de seda per trenta veste de brochè d'oro, sopra veste 20 de veludo cremexin recamà, et altre 20 de veludo cremexin d'oro bone, et per 15 veste pano damaschin d'oro cremexin recamà, et altre 15 veste de damaschin cremexin d'oro bone, e per 10 veste de pano damaschino di senza oro, et altre 100 veste veludo schieto de cremexin, et altre 100 veste de cremexin, et altre 100 veste raso de ogni sorte senza oro. Et per questo servizio mando lo mio schiavo, et comando che quando vegnirà lo mio glorioso, maximo et benedeto comandamento, non far altrimenti, lo più presto che possibel è a trovar le sopradite robe in la medesima insula, et mandarle de qui con lo medesimo schiavo a la mia altissima et vitoriosa Porta, et li danari pagar del charazo che seti debitori se non basterà le sopradite robe a pagar de lo charazo che vien, et li danari se spedirano, far uno quaderno et scrition d'ogni roba per quanto comprate, e bolarlo e darlo al mio schiavo, et fatilo al più presto è possibel, et non fate altrimenti et le robe da mandar de' esser fine et non triste.

Date a Damasco, a dì 28 Zener, vol dir 1517.

324^a *Capitolo di letere di sier Andrea Sanudo, date in Saline a dì 6 Fevrer 1517.*

Credo che l'anno che vien di qui starà in pericolo, perchè tegno fermo l'ussir de la armada turchesca, qual non pol far altra volta, salvo che venir a queste bande. Et questo perchè el signor Soffi è potentissimo in campagna. Et per più raxon dito Signor si farà venir la sua armada in queste bande.

(1) La carta 222* è bianca.

(2) La carta 223* è bianca.

Prima per le vituarie et per tenir più bassi questi popoli di la Soria, quali tutti monstrano mal voler contra turchi; *etiam* per poter metter de la zente de la armada in terra ne le forteze, et quelle vi è con lui farle andar in el campo, et poi in uno bisogno potersi salvar con el fior di le sue zente. Ditto Signor turco, fenando de andar a caza ne la campagna di Borse, fece la volta di Beneanes per haverlo in le man; el qual dubitandose, havea tolto suso con tutti li soi, et era andato nel paese di suo socero. Per una barca vien de Soldin locho propinquo a la Giazza, si ha del passar di cavalli 4000 dal Scandelorum a la volta di Alepo. Vano per comandamento del Signor turco. Le 12 milia persone che se scrisse erano in Adna et Terso, sono andati in Alepo. Per dita barca si ha algun de li accertava el signor Soffi aver fugado 40 milia persone turchesche erano nel paese de Dearbech, et che le zente del dito signor Soffi erano venute fino sora El Lir, ch'è zornate 3 lonzi di Alepo. A questa nova non se li dà fede per esser referita da' mori, quali voriano cussi per il mal voleno a turchi. Per li primi vegnino di Soria harassi qualche cosa. Ben è vero che el signor Soffi ha mandato a desfidar el Signor turco, a far fato d'arme nel loco fece fatto d'arme ditto Signor turco quando che el rupe Campson el Gauri. El deftedar, qual ti scrissi esser stà decapitado, è stà messo in foudi di torre, per intender ben la cossa, et poi far quello li parerà.

In letera dil ditto, de 8 Fevrer, date in Nicosia.

Da novo basse: el navilio di sier Anzolo Michiel, cum el qual è venuto uno messo del Signor turco, qual richiede veste d'oro numero 100 et veste di seda numero 400 a conto del tributo; al qual li è stà risposo quello è la verità, che in sta insula non ne si trovi 20 di pani de seda acoloradi. Per dito navilio se ha, esser morto Chairbek che era prima signor di Alepo, et poi facto vicesoldan per nome dil Turcho; nè altro se intende de Soria, e questo, perchè niuno osa scriver. Sti magnifici signori et principalmente il clarissimo ambassador, solcita molto mandar biave in Soria per pagamento del Signor, per il tributo de questa insula, et fin hora non se li resta dar salvo che per resto di tributi passati, et a dì 15 de Mazo se li resterà dar altri ducati Tutto se pagará al presente, se si possa haver navili suplica a condur dite biave.